


桂苑華畊

叅

14  
1475  
36





門 4  
號 1475  
卷 36

桂苑筆耕集卷十一

檄書書共十首

唐高麗都統巡官侍御史內供奉崔致遠撰

檄書 四首

檄黃巢書

招趙璋書

告報諸道徵會軍兵書

告報諸道徵促綱運書

書 六首

答浙西周司空書

桂苑筆耕集卷十一

海山仙館叢書

昭和十五年  
十二月二日  
購求



本方卷三 未集卷一 一  
一  
答江西王尚書書

答徐州時溥書

答襄陽郗將軍書

浙西周寶司空書

浙西護軍焦將軍書

檄黃巢書

廣明二年七月八日諸道都統檢校太尉某告黃巢夫  
守正修常曰道臨危制變曰權智者成之於順時愚者  
敗之於逆理然則雖百年繫命生死難期而萬事主心

是非可辨今我以王師則有征無戰軍政則先惠後誅  
將期尅復上京固且敷陳大信敬承善論用戢奸謀且  
汝素是遐毗驟爲勁敵偶因乘勢輒敢亂常遂乃包藏  
禍心竊弄神器侵凌城闕穢黷宮闈旣當罪極滔天必  
見敗深塗地噫唐虞已降苗扈弗賓無良無賴之徒不  
義不忠之輩爾曹所作何代而無遠則有劉曜王敦覬  
覷晉室近則有祿山朱泚吠噪皇家彼皆或手握強兵  
或身居重任叱咤則雷奔電走喧呼則霧塞烟橫然猶  
暫逞奸圖終殲醜類日輪闊輾豈縱妖氛天網高懸必



除克族况汝出自閭閻之末起於隴畝之間以焚劫爲  
良謀以殺傷爲急務有大憊可以擢髮無小善可以贖  
身不唯天下之人皆思顯戮抑亦地中之鬼已議陰誅  
縱饒假氣遊魂早合亡神奪魄凡爲人事莫若自知吾  
不妄言汝須審聽比者我國家德深含垢恩重棄瑕授  
爾節旄寄爾方鎮爾猶自揚鳩毒不斂梟聲動則鬻人  
行唯吠主乃至身負元化兵纏紫微公侯則奔竄危途  
警蹕則巡遊遠地不能早歸德義但養頑克斯則聖上  
於汝有赦罪之恩汝則於國有辜恩之罪必當死亡無

日何不畏懼於天况周鼎非發問之端漢宮豈偷安之  
所不知爾意終欲奚爲汝不聽乎道德經云飄風不終  
朝驟雨不終日天地尙不能久而况於人乎又不聽乎  
春秋傳曰天之假助不善非祚之也厚其凶惡而降之  
罰今汝藏奸匿暴惡積禍盈危以自安迷以不復所謂  
燕巢幕上漫恣鸞飛魚戲鼎中卽看焦爛我緝熙雄畧  
糾合諸軍猛將雲飛勇士雨集高旌大旆圍將楚塞之  
風戰艦樓船塞斷吳江之浪陶太尉銳於破敵楊司空  
嚴可稱神旁眺八維橫行萬里旣謂廣張烈火蒸彼鴻



毛何殊高舉泰山壓其鳥卵即日金神御節水伯迎師  
商風助肅殺之威晨露滌昏煩之氣波濤既息道路卽  
通當解纜於石頭孫權後殿佇落帆於峴首杜預前驅  
收復京都尅期旬朔但以好生惡殺上帝深仁屈法申  
恩大朝令典討官賊者不懷私忿諭迷途者固在直言  
飛吾折簡之詞解爾倒懸之急汝其無成膠柱早學見  
機善自爲謀過而能改若願分茅列土開國承家免身  
首之橫分得功名之卓立無取信於面友可傳榮於耳  
孫此非兒女子所知實乃大丈夫之事早須相報無用

見疑我命戴皇天信資白水必須言發響應不可恩多  
怨深或若狂走所牽酣眠未寤猶將拒轍固欲守株則  
乃批熊拉豹之師一麾撲滅烏合鳴張之眾四散分飛  
身爲齊斧之膏骨作戎車之粉妻兒被戮宗族見誅想  
當燃腹之時必恐噬臍不及爾須酌量進退分別否臧  
與其叛而滅亡曷若順而榮貴但所望者必能致之勉  
奪壯士之規立期豹變無執愚夫之慮坐守狐疑某告

招趙璋書

都統太尉騎問趙璋古人有言曰大廈成而燕雀相賀



湯沐具而蟣蝨相弔審其賀之與弔由彼依之與違且爾同惡相成異謀斯構遠爲犯順尙敢偷安今我水陸徵軍天人助信久審風雲之會遠揚雷電之威卽當行展豹韜立擒梟帥剋收城闕靜剋烟塵想計爾曹具知吾意但以先春而後秋者天之道重賞而輕罰者君之恩遂乃馳吾咫尺之書問爾方寸之事爾等依憑大憝猾亂中朝罪已貫盈理須誅翦然若黃巢狠性能改雄心自新望其國封建彼家社勲業可超今邁古恩榮可付子傳孫必爲致之速相報也如或螳螂努臂狹狹磨

牙輒欲拒張必當撲滅爾須詳審至理勸誘元兇欲令天下知名早申忠節奈何草間求活終作叛徒况居成算之中卽在覆巢之下死生有命禍福無門唯審是非可知成敗所謂燕雀相賀蟣蝨相弔實在於知與不知順與不順良時易失嘉會難逢生爲有害之人死作無知之鬼深可耻也深可痛也勉唯去就早副指蹤悉之

告報諸道徵會軍兵書

中和二年五月十二日具銜某謹告某州府節度使逆賊黃巢自亂天常亟移星律縱使擢其賈髮詰罪難窮



未能春彼狄喉稔奸斯極神誅可俟鬼怪何憑而敢鳴  
張鳳城熊據龍闕至於五尺童子猶欲請纓况在四方  
諸侯忍爲投袂偶屬朝廷密施廣畫先倚甸侯不勞十  
道徵驅必謂一毫蕩定豈料軍令雖殊於兒戲將名莫  
驗於童謠未暇褰旗旋聆反旆遂使犬猶狂吠猿不驚  
號徒招翫寇之譏孰擅弭兵之譽聖上暫飛日馭親省  
風謠蔭暘行恩睿慮則雖勞罪已慕羶結望羣情則却  
怨後予然而自幸龜城久停鑾輅秦雲遠隔蜀柳再芳  
每興霜露之懷聖情可想未滅烟塵之患臣節何安某

去年羽檄先馳牙璋後舉唱義聲於遐邇養勇氣於偏  
裨於是廣徵陶侃之船久握辛毗之鉞畫鷁齊飛於雪  
浪檣烏高轉於烟空必欲帆張曉風旗侵夜月纔離楚  
岸便到漢江直驅背水之師永破滔天之孽而乃未施  
豹畧頻降鳳書已知諸道進軍不許遠藩離任詔旨云  
爲朕全吳越之地遣朕無東南之憂是以再閱綸音遂  
回組甲蓋乃仰遵帝命固非敢緩師期今則萬里專征  
誰能奮翼三年縱敵尙許磨牙賊巢雖戲鼎中已居机  
上掘尾狗子輒曾發狂斷頭將軍難可釋怒某幸忝握



兵之要固當仗義而行近奉詔條遍徵戎旅一呼巡屬  
四集驍雄不唯被練三千實有控弦十萬已取今月十  
八日部領兵士發離本鎮必得直趨汴道徑入潼關立  
剗梟巢去迎鑿駕引舜風之無外覩漢日之再中况都  
統王令公暗運智機別操戎柄已提勁卒卽展奇功足  
可相應軍謀其興王畧諸道自從賊盛皆峻官榮况爲  
食土之毛盡思効命矧乃荷天之寵豈合安身且大丈夫  
之在世也壯氣難申良時易失苟或美事讓他人之  
手殊恩負聖主之心則莫測肺肝何施面目固應各勤

訓練同願誅鋤瞻帶輦而魂飛擁戎軒而毗裂早看行  
色勿懷兒女之悲須把戰勳永作子孫之福謹告

告報諸道徵促綱運書

謹告某州節度使夫忠於國者無以家爲是故漢代徵  
臣有傾產助邊之請魏朝烈士有舉宗陳力之言况乃  
邊寄榮身兵符在手遇大朝之多難見上宰之董戎而  
不能役致泛舟令行挈畚使戰士猶多饑色將軍未獻  
捷書但忝分憂實爲忍耻某昨從中夏再集大軍不慙  
素飽之名已警無譁之眾仍差都押衙韓汶先賫金帛



木苑書集卷十一  
百萬匹救接都統令公軍前既裝運船將扣飛檝言遵  
汴道徑指圃田乃值徐戎來侵淮口扼斷河路攻圍郡  
城近者又擁寇徒直衝近境敢憑蝟結欲恣鯨吞當道  
既見阻艱暫須停駐遂乃揀徵驍勇往討頑寇佇靜封  
疆便登道路必可豁通綱運廣備供輸行稱東道主人  
非無意也立斬南陽太守竊有志焉諸道久荷深恩各  
居重任縱以家門寶貨猶合贍軍况將州縣賦輿豈宜  
壅利其宣武忠武天平昭義泰寧平虜河陽等道盡發  
雄師咸從統命共依饋運各已通流其浙東浙西宣州

江西鄂州荆南湖南嶺南福建等道今欲踰年未聆發  
運若由水路須入汴河如此稽畱何因濟集必計杜畿  
美化遍得人心任峻奇謀兼施兵力速請同勤饋輦繼  
發綱船齊至都統軍前早期收復京闕其徐州實爲國  
蠹豈止隣讎蓋以天暫容奸地猶聚慝昔爲龐勛叛亂  
早合瀦宮昨因時溥猖狂更宜塗地偶屬朝廷未誅大  
愆不問小瑕貴悅軍情驟加爵賞而乃時溥罔遵詔旨  
尙構奸謀去年曾犯淮山今夏又侵泗水乃作黃巢外  
應久妨諸道進軍先須剗當路之豺狼後可殄壞堤之



蠓蟻冀使隋皇新路楊柳含春無合漢祖舊鄉荆榛撲地凡承寵寄其察忠誠謹告

答浙西周司空書

某白忽覽來示驚憤兩深是何見事之乖如此發言之過且趙公約者背軍逃走行怙追擒遽投跡於貴藩遂偷生於逋藪今則異端斯構細作爲名若能懷上士之心豈可信下人之口譚何容易事不酌量來示云位極上公權專都統別興異見遽起他謀以何悔尤欲爲燒劫此乃稍殊雅責僅涉穢詞鼠尙有皮蓋譏無禮駟難

及番亦戒慎言豈是不爲虐今誠非所可道也司空晚歲縱不以學識爲長從事雋才亦合以智謀相贊虛成啗飯難望和羹未諭是非須陳本末具標五信無貯一疑且此三世立功無非報國四方出鎮曾不安家身持將相之權手握恩威之柄豈獨撫淮邊之俗終期安海內之人方切輯綏何言侵伐其可信而不合疑者一也况今黃巾尙熾翠輦未歸方驅貔虎之師欲破豺狼之窟遠離弊鎮深託善鄰臨危而猶冀依憑守靜而更除損害其可信而不合疑者二也司空早聯中外永保初終



言既馥於芝蘭操彌貞於松桂曾無釁隙每有音書偏  
深魯衛之懼永絕張陳之事其可信而不合疑者三也  
淞西始爲交代未得多時陶公之官柳誰移召伯之遺  
棠不讓至於賊壘猶將信義招行况是舊藩豈以兵戎  
侵逼其可信而不合疑者四也昨自師過江浦令肅雪  
霜軍門則擊柝夜嚴行路則銜枚晝靜豈有任從海則  
登舫趙公約則隔簾通報旣不難爲指麾又何易得直  
至上流嘉客不暇接迎是何下等健兒敢來親近其可  
信而不合疑者五也粗申大較可察中心何乃憑叛卒

之讒詞失賢人之事體以此陳奏聖主以此傳告諸侯  
非我無詞是誰有過細審來旨莫測貴懷爲當老耄所  
侵末年多變爲復狂迷偶作忠節遽乖夫耳不辨五聲  
曰聾目不分五采曰昧司空久當重寄已謂元臣因何  
妄發莠言或似自懷蓬性不知彭寵此時有按劍之疑  
却恐廉頗他日無負荆之處噫將帥則空榮列土君王  
則尚遠蒙塵更無匡復之誠唯有猜嫌之事祇隔一條  
水脈便興萬種風言必計心虛遂成口實大凡獻酬以  
禮來往爲書理失其中事生非小且須審諦勿恣豪強



於此難盡私誠其他備載公牒無遺後悔併棄前功某

答江西王尚書書

十二月六日某白閣下遠損長書深貽善諭一覽而發皇耳目再窺而驚越神魂是何詞彩之彬彬能致言端之懇懇既知約我以禮方信起予者商况乃事徵於差里聖人道媿於首陽義士切磋雖至刻畫何勝敬佩良箴專銘鄙抱然慮虛聲易應真寶難知弄脣吻以鑠金眾皆妙手拭瞳眸而辨玉多是清盲苟非原始要終則必唱予和汝是以畧陳梗槩用察根源匪欲廣援古今

所希暫曉左右僅同伐善豈免興慙君其審之僕所望也僕與浙帥周司空早於鳳里相識亦爲鴿原往還接載笑載言之時展如兄如弟之分况作建旗交代真爲結綬相知既睦比鄰罷局外戶江南江北祇鬪行春三楚三吳盡喧來暮方謂憑我友歲寒之節解吾君宵旰之憂豈料蒼鳥高飛翠華遠狩僕以久叨重寄便決專征偶緣兵力未加人心尙懾遂於春首先發羽書仍請都統判官顧雲協律議共成之事謀相見之期固非閱被廬之軍徵夾谷之會實欲親謀歃血方寫痛心若能



接濟師徒粗得振揚聲勢而乃周司空却自棄同卽異不能捨短從長忽疑惑於澠池謂矜誇於踐土便見戒嚴城壁阻塞津途構猜嫌而信有小人遺故舊而曾無大過僕雖逢彼怒但守吾真及至中夏出軍外方多事冀安弊鎮苟倚近鄰又合幕客過江請爲都統副使豈銜弓旗之禮邀辟元戎祇憑鈇鉞之威撫綏近境周司空確乎阻意莞爾興譏不從固請之言自惜有餘之刃頓移曩顧但積沈猜見此初屯下瀨之師未設中流之誓猶淹水道久候天風軍聲旣振於四鄰人意自防於

兩岸偶有背軍官健趙公約者走投浙西釣以巧言構爲細作便移長牒妄說異端其書云位極上公權專都統別興異見遽起他謀以何悔尤欲爲燒劫僕以趙襄子之忍辱念茲在茲藺相如之慎微有始有卒遂馳書牒具述事情聞司空尙發怨言自懷怍色與宣護景虔貞徐帥時溥者暗資積釁相應密謀各興梗路之兵戈遍告沿江之郡邑以至練成戰陣鎖斷征途僕若不辭險阻之虞必致殺傷之患坐甲而未期破竹回車而用待負荆尋屬繼奉絲綸不令離鎮遂驅組練卻已班師



雖云帝命斯遵實乃隣兵所阻彼宣州者亦有所因春  
初寇犯黔州勢侵旬水况值前廉已去新帥未來既無  
禦捍之權恐落奸克之便遂差押衙馮綬暫令安撫郡  
城蓋緣會奉詔書特許便宜從事凡於制置得以指麾  
景虔貞常侍菽粟不分蘭猶莫辨謂言專輒遽有侵凌  
殺害軍人劫掠財物馮綬幾臨死所劣得生還自此隋  
國怨興謝城信絕將投彼鼠其如有礙之時欲債於豚  
又是無端之事且爲含忍未及通和必知橫被織羅巧  
成貝錦傳之於遠誰曰不然噫滔滔者天下皆同君子

所恥泛泛如水中自樂壯夫不爲但問事之若何則知  
曲之在彼今則特垂教督益驗獎憐自緣有理可申豈  
便無辭以對固非飾過不敢憑虛莊生不云乎其智適  
足以知人之過而不知其所以過若非辱殷勤之旨何  
以息睚眦之詞僕也不能嫉惡如讎唯以用和爲貴但  
以賢愚其惑本末未彰復書而不覺詞繁比事而終慙  
理短身修三省勉尋曾子之規心敬一言永荷伯陽之  
惠幸垂鑑志某頓首

答徐州時溥書



六月十六日某白僕射足下特辱長牒仍移公牒細詳  
來旨頗涉多端有同戲以前言無乃驚於眾聽雖倚兵  
強力壯其如作僞心勞且泗水舊隸仁封新標使額固  
非郡守專輒蓋是朝廷指揮爲在頃年獨全忠節遂編  
名於防禦永傳賞於驍雄近者久結隣讎蓋遵國典獨  
行直道固守危城嘗膽爭先斷頭非苦此亦古人云寧  
爲忠鬼不作叛臣之義也况于尙書有定國恩威有粟  
礪武勇自安疲俗甚洽羣情每將句踐單醪均沾無黨  
不獨臧洪薄粥分啜有餘固當散三年之儲充一日之

費寡能敵眾安可待勞豈比於築室反耕杜門卻掃者  
哉忽覩來示云泗州獨阻淮河自牢城壘使四方多阻  
諸道莫通而又每於朝廷妄爲訕謫今有城中將校潛  
來計圖請少振兵戎即便期開泰者大凡人事莫若自  
知足下去年忍雋不禁求榮頗切暫奮橫行之氣果成  
順守之權是以累受國恩遠膺藩寄豈可尊身忽物是  
已非人偏致嫌於蘭生終歸過於季氏其於淮河久阻  
道路不通皆因貴府出兵不是泗濱爲梗是非可辨遠  
近所聆去歲夏初早蒙侵伐呼蟻軍於漣水拒虎旅於



淮山此緣將援親仁難逃善戰爰謀薄伐用救倒懸君  
異荀吳莫振受降之譽僕慙呂布有虧解鬪之言泗州  
以實奏陳豈爲誦譁僕也雖慙知己嘗敢薦賢亦曾錄  
詔寄呈必合垂情見悉誰料旣踰望始翻起釁端甲兵  
繼興疆場頻駭所云泗州城中將校頻來計圖此乃巧  
飾虛辭遍行長牒盡知譎詭孰肯詭隨朝廷以足下身  
處雄城刃多餘地委催綱運冀濟權宜但自戢斂兵車  
必得流通饋輦今則却云奉朝廷意旨收徐泗封疆廣  
出師徒難窮事意必若足下訓戎勇銳報主忠勤何不

親總全軍往殲巨憝早立非常之效以酬不次之恩而  
乃知僕再次西征卽謀北渡便侵泗境來犯淮壩負國  
家之寵榮構州縣之患害幸其賊勢阻此師期未諭雅  
懷何辜聖獎言但繁於枝葉事莫究於根源來示又云  
此皆廬州海州皆爲背叛累來投款不遣措詞者強謂  
恩情形於書札顏雖不厚心且何安彼東海廬江偶聚  
奸惡異端斯起旣非鄭有人焉同氣相求盡是跖之徒  
也足下已居重任不徇危謀自守詔條何煩飾說僕累  
將軍食頻救臨淮爲分順逆之蹤令保始終之志實以



泗州曾非杞子之無禮亦類展禽之有詞每當告急告窮唯以行仁行義唯望足下暫息餘怒深量遠圖且先報國之誠無急伐隣之役兼覩詔書獎諭請與忠武協和足見睿情俾銷微憾在於臣子合更慎思求將安撫氓黎速自追迴士卒苟或上負君命下違物情隔礙征途侵凌近境則亦難辭借一用試當干必見傷禽易驚困獸猶鬪悔須防後險已居前矧乃泗州以抱節爲名貴鎮以翫兵爲務泗州則唯遵王化貴鎮則虛構牒詞以較否臧可知曲直是敢遠申忠告冀絕後誣正當聖

主蒙塵未除禍難何忍諸侯列士更起兵戎猛發忠言懶爲諂笑勉思大體勿暴小瑕必因此日所箴却得後時見謝幸從誠信無損功名某頓首

答襄陽郟將軍書

中和二年七月四日具銜高某謹復書於將軍閣下某側窺前史嘗慕古賢贈人以至言則老聃垂誠成我者良友則管仲知恩但恨季俗寢訛芳規僅喪豈期今日得覩餘風將軍唯恐掩瑜欲令磨玷特勞彩翰遠辱長牋初尋歸美之獎詞汗驚浹背後覽扶危之箴諭淚迸



沾頤既乃粲然可觀焉敢率爾而對輒憑毫素仰疏血  
誠終冀恩私畧乖採覽幸甚幸甚某自去年春知寇侵  
秦甸帝幸蜀川欲會兵於大梁遂傳檄於外鎮練成軍  
伍選定行期便被武寧忽興戎役先侵泗境後犯淮壩  
聲言則狼顧舊封實意則鯨吞弊鎮長驅猛陣直犯近  
疆是以分遣偏裨果殲兇醜及當中夏乃出大軍既知  
其北路阻艱遂決於西征利涉尊奉詔旨云卿手下甲  
兵數少眼前防慮處多但保淮南之封疆協和浙右之  
師旅爲朕全吳越之地遣朕無東南之憂言其垂功固

亦不朽某以兵機固難自滯君命有所不從已事征行  
必期進發占風選日只欲奮飛又奉七月十一日詔旨  
云諸道師徒四面攻討計度收剋旦夕可期卿宜式遏  
寇戎饋輦粟帛何必離任則是勤王或恐餘孽遁逃最  
要先事布置以此再承綸旨遂駐舟師唯廣利權宜供  
戎費殊不知無虧進退唯命是從却被近鎮讒誣聖朝  
猜慮食駃騠之良肉何敢望焉絆騏驥之駿蹄無能爲  
也遂使忠誠未展睿獎難期非敢自辜海內之人心但  
養淮邊之兵力詢之於理良有所因將軍以泗州舊屬



彭門謂某妄爲占護必慮未詳狡計或採浮詞且徐州  
昨自俯張更無戢斂威權旣盛暴虐轉深見某自五月  
初再謀征討已排勁卒欲援令公兼差都押衙韓汝先  
賁一百萬貫救濟都統軍前盡載舟船將臨道路又興  
兵甲來擾疆陲把斷淮河簇成寨柵是以行計猶阻羣  
情莫安細察徐州所爲是作黃巢外應不然則何以每  
見當軍臨發卽將克黨奔衝又乃執稱泗濱阻絕汴路  
且臨淮則城孤氣寡劣保疲羸彭門則地險兵強恐行  
狂悖以茲斟酌可見端倪况無諸道綱船曾過泗州本

路今則皆因此寇卻滯諸綱近則浙東浙西遠則容府  
廣府並未聆饋運何濟急難某見簇楚師俾誅餘孽一  
則遵行詔旨救援鄰封二則得靜長淮欲登征路固非  
貪泗民之租稅排徐帥之兵戎蓋分曲直之端將保初  
終之節泗州二年閉壘一境絕烟織婦停梭耕夫釋耒  
滿城軍食猶仰給於弊藩閩郡賦輿固難徵於疲俗將  
軍謂某藉其地利構此鄰讎細閱來言難知深意泗州  
不獨咸通之際得振雄聲曾於天寶之中亦遵直道况  
于濤尙書政條旣舉武畧兼精收百姓之歡心得三軍



之死力將軍便令棄而不問理復如何徐州實有大德固非小患若將助虐豈謂輸忠某今所俟者戮當道之豺狼奮乘秋之鷗鷁星言夙邁電擊專征必與王令公腹心見知首尾相應齊驅蛇陣豁展豹韜尅復上京奉迎大駕亦不敢負秣陵之節度爭強弩之功名所冀得繼前勞自防後患使藺相如之謙德不損雄威費無極之讒徒皆歸顯戮捨此之外餘無所云敬佩良箴豈離愚抱伏惟鑑察某再拜

浙西周寶司空書

昨奉公牒云當道臨淮叛卒過江來投集眾廣場已受降訖三復來示言雖不酬且降之爲名其理甚大虞舜之七旬苗格晉侯之三日原歸此皆以干紀亂常起兵動眾緩之則稔成患害急之則橫致殺傷遂假小慈終施大信能敷德化俾革奸克若有偶聚萑蒲散爲榛梗者其須撲滅勿使晏安今相公幸此隣灾樂其軍禍莫能嫉惡翻欲惠奸恐乖仗鉞之威虛銜倒戈之捷且如去年陳儒徒伴唐突貴鎮封疆僅有六萬餘人宣州日告危急此時相公何不招諭致令侵凌却見瑣瑣頑克



卽自勤勤誘引莫測高旨實辜眾心傳不云乎召缺外  
盜書不云乎爲逋逃主稍詳至理無信虛詞昔漢朝匈  
奴叛黨來附景帝便欲與之封周亞夫曰彼背其主而  
見賞何以責人臣之節以小喻大可量事情况臨淮一  
郡早從淝上行營及淮邊戰敵每有優賞曾無偏頗自  
是臨財則競起貪心遇賊則皆無鬪志旋爲逗撓猶與  
矜寬昨又請換都頭已依眾請殊不知犬易興於狂瘳  
豕難制於喧豖未盡誅擒便謀奔竄幸且未離近境固  
合同塞奸源在此旣已不忠於彼亦應非利石祁子所

云天下之惡一也惡於宋而保於我保之何補其在茲  
乎况凡隣府事宜一彼一此互相救援同致安寧是以  
前年六月中貴鎮有天平潞府元從兵士背叛奔逃數  
僅百人爲患非小遂蒙移牒請爲追擒當使羌都將梁  
楚部領馬軍所在討襲並各帖管內諸州令差精兵同  
力捕逐尋卽諸鎮及東塘遊奕使相次收獲三十八人  
纔見擒來便令押送續得梁楚狀報到濠州界趕及殘  
孽殺得三十餘人其餘漏網之徒盡以傷弓而走所生  
擒之克黨皆就戮於貴藩能致彼之快心實賴此之勞



力今則却見臨淮叛卒特向沿江招呼便稱受降仍缺  
補職累牒咨請不送過江蒐慝何多養奸斯甚敢言以  
怨報德實恐在安忘危詩云投我以木瓜報之以瓊琚  
匪報也永以爲好此乃國風遺訓昭晰可觀相公通人  
畧賜詳度無自賈天下之戮笑也其他已具迴牒伏惟  
俯賜照察

浙西護軍焦將軍書

昨有臨淮背叛兵士誅擒不盡奔逃過江便蒙貴鎮相  
公特許歸降遍加補署兼移公牒頗構虛詞旣乖七縱

之謀誰謂三驅之禮蓋是幸災樂禍固非撫士安人自  
古受降之爲義也叛而伐之服而捨之忠信能敷德刑  
乃就或以賊數則動盈千萬奸謀則難測二三若欲戰  
爭恐多傷殺或吹笳感動或書箭招呼免致膏鋒俾從  
肉袒其或蕞爾克狡率然叛離免奔岡而終必自顛鼠  
失穴而將欲安往在於接境合與同擒不料豁開伴奩  
之門深作逋逃之藪慰安螻蟻雖欲好生訓練熊羆有  
何用處纔招稔惡之輩遽銜受降之名蘊豹韜而畧不  
弛張對龍節而恐須慙愧魯史云晉楚設誓無相加戎



同卹災危備救凶患若有害楚則晉伐之在晉楚亦如  
之交贊往來道路無壅謀其不協而討不庭此則古時  
敵國猶保話言今日善鄰豈傷師律况晉楚則各在遠  
地揚潤則只隔長江曾無交惡之端豈有相欺之事實  
驚眾聽甚爽遠圖已無蠶女爭桑永安兩境宜效農夫  
去草靜剗本根伏惟將軍遠護兵符共成王事必不欲  
和之如響知而不言唯望稍致良箴終除巨弊永使必  
誠必信誰云莫往莫來此既無噂喏以背憎彼亦免忸  
怩於顏厚幸垂採聽特惠終始伏惟云云



桂苑筆耕集卷十二

南海譚瑩校

桂苑筆耕集卷十二

委曲二十首

委曲 二十首

滁州許勅

昭義成璘

廬江縣令李清

淮口鎮李質

光州李罕之

楚壽兩州防秋迴戈將士

歸順軍孫端



楚州張雄

楚州張義府

滁州許勅

壽州張翽

廬州楊行敏

和州秦彥

盧傳

戴盧

光州王緒

楚州營田判官綦母蘋

鄆州耿元審

海陵鎮高霸

淮口李質

滁州許勅

報許勅得狀知妻劉氏將從征討願效勤勞嘉尚之懷  
諭言不及吾嘗覽後魏書見楊大眼者武伎絕倫戰功  
居最其妻潘氏頗善騎射至於攻戰遊獵之際潘亦戎  
裝齊鑣並驅及至還營同坐幕下對諸寮佐笑言自得



大眼時指諸人曰此潘將軍也吾思見若人爲日已久  
不期今夕得舉妙才此亦可謂劉將軍矣想鼓鼙方振  
琴瑟相隨旣在同心可知竭力教戰則必欺孫武解圍  
則可假陳平勉致殊功卽行懋賞悉之不具云云

昭義成璘

報成璘大夫魯史云臣一主二漢書曰一心可以事百  
君則知下有離心蓋爲上無全德姪孫僕射夙虧家訓  
驟荷國恩累忝藩方曾微績効每於撫俗畧不隨時恩  
威豈得並行寬猛無由相濟况近關西之賊窟持山北

之兵權戰伐旣勞輯綏莫至固知軍情潰散物議喧張  
大夫名旣超倫事能從眾息貔貅之憤怒慰黎庶之疲  
羸實謂有三雋才誰云犯五不韙古之所有今也何疑  
遠遣專人迎取家口儻或行程齟齬且令彼處婆娑如  
能斷送出來便與支持發遣一踣墜履猶能牽念舊之  
心百口孤孀何忍見含愁之色必應慰暖免至饑寒倚  
望所多諭言無及彼但勤修政理佇荷寵榮不令外盜  
侵凌必見大君委寄冬寒慎爲將息節級各與安存悉  
之



廬江縣令李清

報李令昔有垣榮祖者少曾學武或曰何不學書答云上馬橫槊下馬談經方可謂不負飲食矣若無自全之伎何異於犬羊乎昨見所申眾情可獎昔也一百里之疲俗託在神君今則十八砦之義兵請爲軍帥若非寬將猛濟惠與威行則何以鯁鮓懷仁各能遂性熊羆聚黨盡得降心姑拋堂上之琴便握匣中之劍所謂文一變而至於武者也况李令族聯天派名比水源才機爲一代之雄心術乃萬人之敵足得以指麾銳卒掃蕩叛

徒不惟除郡邑之災亦可定國家之難然而軍務旣常獨理職銜須有可稱未見所求固難抑致爲復願兼知戎役却守縣曹爲復欲改轍從知乘機立事察斯二者決取一途專期奏論早與飛報且如班超投筆蒯恩捨芻當池蛟得水之秋有天驥追風之便古詩云寧爲百夫長羞作一書生信知倜儻之人懶守低徊之節勉成勳業永荷寵光戎務方殷善自將息諸寨將士各與慰問悉之

淮口鎮李質



報李質覽所申狀慰愜良多李再興未革狼心敢張蜂  
目構稱虛事違負本軍初憑逐寇之名却設起戎之計  
賴質深懷智策善審兵機一唱義聲四圍逆黨狀疾風  
之掃危葉如烈火之熱飛蓬再興將見誅夷果當懾竄  
然既是傷弓之物必爲釁鼓之資兼知質男裕黃口小  
兒血氣未定偶虧嚴父之訓以涉叛夫之謀質又徇公  
絕私捨曲取直愛而知惡義而滅親削其舐犢之言遵  
彼烹臯之理若非忠勇何得如斯古語有之蝮蛇在手  
則壯士斷其節是乃忍小痛而除大患也况石碣傳芳

於魯史日磬載美於漢書故事斯存令名不朽足以見  
質有大丈夫之氣有真君子之心權兵而動必成功鎮  
境而靜能守節前勞後効日就月將固當榮盛可期勿  
以滯淹爲恨勉安軍旅善保勳名以古况今惟吾知汝  
悉之

光州李罕之

報李罕之成覲有言彼丈夫也我丈夫也然則成功立  
節不獨古人仗順輸忠正當今日近奉勅書手詔無非  
激勵眾心兼除王令公充都統西門軍容充都監此乃



藩鎮功虧朝廷計盡遂將大任專付老儒雖漫傳聲必  
難濟事此去年齊驅猛銳將掃頑兇尋奉絲綸俾安淮  
海詔書云爲朕全吳越之地遣朕無東南之憂遂乃旋  
師不敢違命然則詳審物議參酌軍期關中有執斧之  
徒闔外無枕戈之志誰能竭力實可痛心吾若不行眾  
將焉往今欲直趨汴路便入潼關佇復鳳城奉迎鑾駕  
永使流傳萬代終能肅靜四方罕之已處分憂久爲養  
勇必欲揀精練銳以期伐叛摧兇今錄勅書手詔白寄  
往仰窺聖旨必勵忠誠便決征行共圖富貴時不可失

吾子勉之故此告知速宜飛報悉之

楚壽兩州防秋迴戈將士

報王承問等久勞防戍又役戰征知得遠歸良多慰愜  
詩稱束楚不免怨思傳載及瓜亦嘗憤恚古之難事今  
見忠誠况承問限過三年訓齊一旅值國家之多難息  
鄉井之懷歸言下忘身軍前効命遂得永別伍符之列  
高登八座之榮固知實勤豈慮虛擲且往年被練而去  
今日衣錦而迴孫權努力之言已成顯驗王昶寶身之  
誠更慎操持深秋遠行善自將息節級將士遍與安存



遣此不具

歸順軍孫端

報孫端將軍自從歸投久處閒散想多鬱悒不暫弭忘  
但以端職秩已高官資須稱使司累具奏薦朝廷則有  
指揮且仰安撫師徒佇迎恩命古人貴其晚達君子誠  
其速成王化既無偏無頗寵章則盡善盡美勉期守順  
勿念躁求秋晚其涼切慎將息節級遍與慰問悉之

楚州張雄

報張雄中丞得狀知已點練兵士兼請出軍西去討逆

賊徒憤氣勃興忠詞懇切覽之嘉歎深置於懷且每值  
寇戎稍侵疆圉雄必心騰勇畧首唱義聲去年已建殊  
功今日又申丹請不辭危於馬革願展用於豹韜實謂  
起予者雄始可與言兵已矣則帝委之以郡侯吾待之  
以國士永揚茂績固在良時然彼州司事力猶困未可  
便謀征役且宜更候指揮兵士各與慰安秋深善自將  
息馳此不具

楚州張義府

報張義府得狀兼送罰錢引咎自責足驗用心古語有



之人誰無過過而能改善莫大焉饋餼之儀春秋所重在於屬郡豈可外交勿爲饑則附人別欲申於知己將滅白圭之玷遂以金作贖刑細覽來詞似懷他慮膚受之愬固不行焉但慎始終永圖富貴悉之

滁州許勅

報許勅語曰兵食可去無信不立則知守信之道乃是立身之本歟苟若壞隳自爲顛覆訪知近日浙西周相公頻差上元鎮使馬暨專贖書曲兼將金銀送到和州說誘秦彥令歸浙岸許授雪川信使繼來事情甚細則

未知秦彥終欲如何且浙西素乏勳勞驟沾恩寵謂得長久遽爲驕矜殊不知人盡指楹鬼多瞰室惡旣天稔道唯日亡今更阻絕我通津動搖我屬郡已乖眾議可見前途以勅直木干等精金百鍊固無憂於邪曲終不改於貞剛况乃邦媛相隨家肥是保永除異慮必享同榮或恐未審浙西所爲先此告示悉之

壽州張翱

報張翱知已部領兵士將赴令公軍前言念遠征倍所加念且仗鉞者皆誇闔外分珪者略滿寰中而乃顧家



產爲遠圖剗國讎爲閒事唯矜肉食孰肯身先今則翺  
首唱義聲躬提銳卒騁大丈夫之志氣副上宰相之指  
蹤况知素蘊機謀久施訓練佇伸壯節必樹奇功當五  
馬離鄉遠境之芳聲獨振及六龍歸闕前程之變化難  
量暫此苦辛善爲將理今附衣段銀器茶藥等往到宜  
檢領春寒慎爲行李將士倍與慰安馳此不具云云

廬州楊行敏

報楊行敏使至得狀送芝草圖一軸覽之嘉歎喜有餘  
懷且草木之祥異也雖自天成皆因地秀物有所應吾

何以堪行敏始假都符已彰瑞牒天其誠爾爾宜慎之  
况鄉號千年村名穀祿足驗一百年之壽與二千石之  
資固保前程之富貴矣將酬美貺更勵忠誠非恡獎詞  
慮驕銳志悉之夏熱切好將息使迴附此不具云云

和州秦彥

報秦彥尙書使至得狀兼送羊五百口勤誠斯展其數  
實繁所謂爾羊來思我愛其禮况彥雖榮建隼能效懸  
魚遠傳廉慎之名深舉撫綏之政而乃特申懇悃倍所  
歎嘉旣無慮於觸藩勉致功於荷筮使迴附此不具



盧傳

報盧傳殿中監裴尙書將到洪州武寧縣人吏百姓及僧道等狀舉論傳前後戰敵賊徒保全縣邑功績一十五件細覽事實慰愜滿懷傳不云乎公侯子孫必復其始傳能資餘慶無忘聿修自值危時便揚壯節一呼義旅四討克徒兄弟二人義聲俱唱遂得疲忙獲賴廉使見知始提百里之權尋假六條之寄忠誠所至寵命非遙勉慎始終穩圖富貴所希薦舉必不弭忘悉之

戴盧

報戴盧殿中監裴尙書經過彼縣日得百姓僧道等狀舉論盧自乾符五年主鎮兼知縣事課績一十三件事皆據實情切舉能詞理燦然良增慰愜盧竭誠報國傾產忘家糺集義軍訓齊宗族撫寧羸瘵捕襲寇戎六年於茲一邑獲賴有功不伐唯善是從遂領縣曹永安鄉黨古者田稱續命邑號義興求之於盧未足多也既增嘉歎不忘薦論勉保忠誠終邀美命悉之

光州王緒

報王緒天不容奸人唯助順苟違至理必亂常刑知緒



昨因顏璋久藏禍心果致眾怒璋既誅戮緒乃奔逃何不束手戎場投身義域而敢更謀嘯聚尙恣喧張自招相鼠之譏莫識牽羊之禮未知爾意終欲奚爲此乃先惠後誅武經所重好生惡殺王化斯行豁開誘善之門俾躡歸仁之路遂加誨諭試問端倪速仰割捨本情指陳他望待詳來狀卽與指麾禮云志不可滿傳曰惡不可長緒之今日其意若何勿驅齊昨枉入罪網秋冷切可將息節級各與慰問悉之

楚州營田判官綦母頴

報綦母評事夫欲均調兵食必須妙選公才供億旣多料量非易評事自匡郡政甚洽物情剗割而案無滯詞淬磨而筆有餘刃今委兼判順國軍糧料舉牒同封寄往孔聖猶爲委吏蕭何亦作功曹唯託幹能無辭猥屑欲令小人懷惠佇看君子勞心悉之

鄆州耿元審

報耿元審古來名將多是耿家綦賈秉弇徽音相繼永言苗裔固瞻機謀元審雖名異雙聲而志能獨立佇申忠勇別埃恩榮况逢危難之秋實建勳勞之日勉存終



始慎守行藏其他並令樊谷面述今寄衣一副烏觜茶  
二觔到宜一一領之秋涼切好將息悉之

海陵鎮高霸

報高霸得進奏院狀報知轉授右散騎常侍永言欣愜  
霈然滿懷昔周盤龍破虜有功繼霑爵賞齊世祖戲之  
曰卿著貂蟬何如兜鍪對曰此貂蟬乃自兜鍪中出耳  
當時以爲名對前史標之美談今此官榮實彰君寵唯  
在專勤戍邊固守邊陲更俟大來永揚忠節知之

淮口李質

報李質得進奏院狀報知質轉授右衛大將軍且自數  
年君恩溥合官榮職賞可謂均沾然而成功可爲受爵  
無愧者屈指而數能復幾人唯質久戍淮壖遠防寇孽  
勤勞最至品秩尙卑今授大將軍之名乃滿烈丈夫之  
望更宜慎守無慮湮沈慰愜歎嘉不離懷抱遣此不具  
云云



桂苑筆耕集卷十二

南海譚瑩校

桂苑筆耕集卷十三

舉牒凡五首內行墨勅牒詞五首

舉牒

五十首內行墨勅牒詞五首

行墨勅授散騎常侍牒詞

授盱眙鎮將鄒唐兼御史中丞

授楚州刺史張雄將軍

授高霸權知江州軍州事

許勅妻劉氏封彭城郡君

請節度判官李瑄大夫充副使

請副使李大夫知留後





請高彥休少府充鹽鐵巡官

請泗州于濤尚書充都指揮使

王榮端公攝右司馬

右司馬王榮端公攝鹽鐵出使巡官

前邵州錄事參軍顧元夫攝桐城縣令

海陵縣令鄭杞

前宣州當塗縣令王翺攝揚子縣令

柳孝讓攝滁州清流縣令

前浙西館驛巡官鄉貢三傳張咸又攝山陽縣丞

前婺州金華縣尉李涵攝天長縣尉

前潁上縣主簿鄭綬攝盛唐縣丞臯韋緘評事薦

諸葛殷知權酒務

李昭望充奉國巡官

柴巖充洪澤雨塘巡官楚州營田

許權攝觀察衙推充洪澤巡官

王榮端公知丹陽監事

臧澣知鹽城監事

趙詞攝和州刺史



行墨勅授散騎常侍牒詞

勅淮南節度鹽鐵轉運等使東面都統兼指揮京西京北神策諸道節度兵馬制置等使牒某官乞右可檢校右散騎常侍餘如故如將軍須言員外置同正員牒准今年二月九日詔應諸州有功刺史及大將軍等如要勸獎者從監察御史至常侍便可墨勅授訖分析聞奏者大君降命元帥從權但云能立勤勞特許先申獎勸漢祖則手無刊印不阻論功武侯則心若懸衡必能舉職用示軍中之賞式資闕下之恩前件官夙蘊壯圖久

從戎事將救奔沈之患固憑擒縱之能垣榮祖之馳名不唯馬稍周盤龍之受爵允稱貂冠事須准詔授檢校右散騎常侍仍具申奏並牒如者故牒

授盱眙鎮將鄒唐兼御史中丞

廣明二年六月十二日使兼都統檢校太尉平章事燕國公牒准詔云云將軍分閩大夫出疆可專未請之權况奉已成之命高懸懋賞用報奇功前件官術繼白猿名齊赤兔夙歸信義備察忠良雖遷柱下之官尙慊軍中之望宜昇專席更勵枕戈爾其心保清廉好對映淮



之月力誇驍銳無慙破浪之風事須准詔行墨勅授御史中丞

授楚州刺史張雄將軍

牒准詔云云見功必賞漢高祖之殊恩承制無疑鄧司空之故事前件官材標落落韻稟錚錚自假使符已揚政績理股肱之名郡登耳目之高官信義相從功名愈振佇擅外臺之寄宜昇大樹之資爾其益勵忠規仰銜成命用副劉宏之善舉無嗟李廣之難封事須准詔行墨勅轉授右武衛將軍員外置同政

授高霸權知江州軍州事

牒准詔應諸州刺史如有軍功卿量加爵賞如有罪犯卿宜書罰別差人知州具狀申奏者大元帥之權既資成命古諸侯之任宜選良才前件官蛟躍池中虎蹲岸上用軍以義守節唯忠不辭白刃之危累挫黃巾之眾或短兵鬪勇或圓陣呈奇動有所成往無不利今以九江闕牧一郡思春將活疲甿命憑幹吏爾其遏強撫弱削弊蠲苛無登庾亮之樓空知翫月好把袁宏之扇且學揚風稍展政聲佇沾恩命事須准詔行墨勅差知江



州軍州事仍具事由申奏並牒知者

許勅妻劉氏封彭城郡君

牒奉處分古者官至大夫室稱命婦遂有從夫之貴乃爲處世之榮而况靜則能慎內言動則克從外役躬擐甲冑志凌雪霜功名既異於常流封拜豈拘於成命以滁州刺史許勅妻劉氏英才天授貞節日彰平欺後魏將軍洛陽失行仰慕聖朝公主司竹興兵一昨專命良夫討除叛卒遽陳丹赤固願同征手驅組練之羣遠攻城壘身脫綺羅之色久犯氛埃四德有餘六韜可試豈

獨家之肥也實謂邦之媛兮夫既冠其銀璫婦宜榮於石窸豈可使松標峻影早致凌雲蘿抱柔姿猶嗟委地先行茂賞用報前功軍中之晉爵策勳與人從欲天上之錦賸鈿軸待鳳銜來事須准詔行墨勅封彭城郡君仍表次錄奏並牒知者

請節度判官李瑄大夫充副使

牒大夫天芝稟秀霜桂含貞蔚爾芳猷每見用和爲貴凜然直氣終能嫉惡如讎信知賢良實救凋弊頃者再握一同之政曾標三異之名既發縣花佇分郡竹而乃



鷓鴣自滯羔鴈相從鉅鹿卑棲劔川遠役察俗而唯資  
婉畫犒師而不乏豐儲果得入奏玉墀出懸金印泊某  
暫臨江陸旋鎮海門永言移節之難咸假運籌之妙一  
來淮甸四換星霜判官德以潤身固爲己任恩能濟物  
不欲人知莅事實繁在公匪懈筆直而吏多畏色鞭輕  
而獄絕冤聲見君子之用心實古人之用意十二年之  
宏益久而彌芳千萬里之追從永以爲好雖將徐榻別  
致猶恐燕臺未高今已假小秩宗兼大司憲不遷職位  
何稱官榮幸屈跡於副車冀揚威於戎幕陳寵宣詔條

無失嘗賴功曹呂虔致郡俗永安亦憑別駕若言今日  
彼在下風事須請攝節度副使表次錄奏

請副使李大夫知雷後

牒大夫劔橫天外珠媚水中雄稜則仰決浮雲溫潤則  
芴無枯草深藏利器久佐遠藩每施婉婉之謀共化蚩  
蚩之俗五鎮相倚一紀於茲嘗於折獄按刑唯遵直道  
縱至旬休節假不離公門敢言知己之難實荷成人之  
美今已三年翫寇尙恣俯張十道徵師遞相逼撓若不  
專征鉄鉞何因倒載干戈遂驅養勇之鋒佇破稔奸之



窟代行拙政畱託長才慰八郡之疲羸察四鄰之劬勤  
冀使袁宏黎庶粗識詠誦無令陶侃賓僚只耽閒戲數  
年臥理今日出行皆資裨助之功聿保始終之惠事須  
請知觀察畱後

請高彥休少府充鹽鐵巡官

牒少府學麟成角詞鳳傳毛偶輕桂客之遊暫樂梅仙  
之曲鶴唳而月籠寒野萬里清音鵬飛而雲簸長天九  
霄高躅幸聯宗黨得接徽猷敢興念於維駒無見辭於  
絆驢稍假縱橫之術終匡幹運之權雖慙燕國之金臺

願接謝家之玉樹同姓必親於異姓今人何讓於古人  
事須請攝鹽鐵巡官表次錄奏

請泗州于濤尚書充都指揮使

牒尚書洞究儒經旁探武緯指清途於萬里收遠郡於  
三年旟看隼飛輶待鹿挾慰疲甿以仁政捍寇盜以智  
謀克歸合浦之珍會散曲堤之眾今者徐戎遺燼敢恣  
侵凌楚卒精鋒佇期掃蕩終免致包胥之哭况非奪晉  
鄙之軍但以鷹犬呈功能罷就列須俟指揮之命仍申  
搏噬之能實託威權遠希統攝俾瞻馬首皆知進退之



宜永滅鼻聲用審否臧之律事須充都指揮使其應接  
諸郡及寧淮盱眙淮陰等三鎮將士悉受指揮

王榮端公攝右司馬

牒端公烏衣茂族鶴望清流早列官榮頗精吏術口中  
金石常聆直韻之高手下銅鹽曾展長才之妙事既同  
於外舉理無愧於有求今則秩挂方書職參典午雖云  
承乏且欲試能憲府威稜他日見豺狼懾伏郡庭閒散  
此時樂魚鳥畱連事須差攝右司馬

右司馬王榮端公攝鹽鐵出使巡官

牒奉處分且權筦之設也本資戎事將贍軍須既當薄  
伐之期實藉均輸之利能成重務固選良才端公韻振  
維山慶流淮水靜處五常之域勤尋六義之門每覽緣  
情備知守節繼委當仁之任皆傳幹吏之名已爲歷試  
諸難可謂多能鄙事今以仰裨國用旁濟兵儲權課方  
殷旬稽匪易官居典午旣已優閒志在推公無辭冗屑  
佇縻幕職立展籌謀雖見王晞長寄心於方外何妨裴  
楷暫勞力於俗中事須請攝鹽鐵出使巡官旬勘當司  
錢物



前邵州錄事參軍顧元夫攝桐城縣令

牒前件官善水無壅謙山自高腹飽詩書口含鋒刃厚  
利唯勤於耕道閒情素懶於釣名爲疎奔競之門尙處  
卑棲之地既能潔已何惜愛人州主簿之提綱昔嘗留  
意邑大夫之製錦今可呈功永言不憚勤勞方謂克承  
闕乏稍念時危而慎守勿云俗弊而難除一門多詠雪  
之才眾推餘慶百里渴象雷之理勉振政聲事須差攝  
舒州桐城縣令

海陵縣令鄭杞

牒奉處分字人之政爲吏所難欲俟三年有成同須一  
日必葺永言委任實藉賢能前件官深於詩敏於行不  
近劉輿脂膩唯資謝朓膏腴累假一同備彰三善瞻彼  
東吳之近境實爲南兗之奧區昔也承乏多歡去思猶  
在今可以舉舊令尹之政修真君子之誠均調政刑遍  
慰黎庶展驥終希於得路割雞無憚於發硎行乎敬哉  
勿墮乃事須請攝海陵縣令

前宣州當塗縣令王翽攝揚子縣令

牒奉處分宰字之術若驅羣雞緩之則散急之則亂此



言雖小其理甚中知者非難行之不易况乃隋城近邑  
楚岸通津螟蝗則久待消除鯁鯁則每思養育前件官  
相門積慶儒室推賢早登廉孝之科嘗愿句稽之任雖  
棲下位不墜令名果逢連帥之知再假字人之秩雉誰  
忍捕鵲自停喧陶潛之腰腹缺孔奮之膏腴不潤今  
以揚子一同繁劇四達要衝每當使命交馳實託宰僚  
勤幹遂重責成之寄况逢多事之秋而乃有令患風請  
告踰月若言考秩亦合替移固選長才俾修闕政其在  
上瞻夏日下視春冰宜無憚於徒勞佇有成於厯試苟

有經年沈醉必虧莅事之能如將終夕清談亦失相時  
之理勉於二說慎自三思事須差攝揚子縣令

柳孝讓攝滁州清流縣令

牒奉處分今世之獎邑大夫也多以河陽花彭澤柳爲  
美事永言至理我則不然唯某在其視人如傷潔已以  
仕能懷冰蘖之操迴掩花柳之名實難其才得副吾意  
前件官展禽苗裔言偃政能曾宰濟陰克安屬邑久依  
江徼靜守窮居數年而雖甚食貧直道而未嘗改節今  
將厯試俾假缺員無與喧鵲之譏勉致驅雞之術事差



攝滁州清流縣令

前浙西館驛巡官鄉貢三傳張咸又攝山陽縣丞  
牒奉處分前件官族資鵠印業練麟經未躬壯圖嘗從  
碎職既精簡牘之事寧辭州縣之勞習傳之體有三能  
詳正義在公之心無二宜慎爾官往矣敬哉賞罰斯在  
事須差攝山陽縣令

前婺州金華縣尉李涵攝天長縣尉

牒奉處分夫縣尉之設也其官雖卑其務甚重動則推  
詳滯獄靜則慰撫疲疇是以佐僚能慕其直聲宰尹亦

懷其畏色永言至理實繫長才前件官性習五常身資  
一命嘗佐金華劇邑頗傳玉潔高名久見退修誠思進  
取俾助養蠲之政且昇化鮪之資其在藁作朝飡冰爲  
夕飲高懸曹棒靜和宓琴譽能息於鴻喧勢必登於鴻  
漸云云

前穎上縣主簿鄭綬攝盛唐縣丞舅韋緘評事薦  
牒奉處分凡城一邑皆列六曹雖云具體而微豈可從  
心所欲况縣丞之佐理也舍長憚其糾摘猾吏稟其規  
程苟能自強何患不立前件官康成求己季智奉公會



申穎上之勤勞遂見渭陽之論舉桓譚貳政且宜肅彼  
奸豪殷浩吟詩無用傷其貧賤事須差攝壽州盛唐縣  
丞

諸葛殷知權酒務

牒奉處分權酷之權起於漢代會計之利著在周經既  
當預備闕懸難可不從改作將成重務固選良才前件  
官隱豹含章臥龍襲慶潔已則隋珠無類在公則庖刃  
有餘昨分孔僅之重司已成厯試今躡魯匡之良策何  
憚專勤無辭鄭驛之卑棲早致卓壚之餘利能資美祿

必贍雄師所期百姓無譁非阻三軍告醉事須差攝館  
驛巡官專知權酒務

李昭望充奉國巡官

牒奉處分昔孔子誠伯魚學曰其先祖不足稱其族姓  
不足道然而大以流聲後裔者豈非學之所致乎若然  
則先祖之與族姓也不唯時世所榮亦乃聖人所重前  
件官搢紳上品結綬中朝方襲芸香遽飄蓬跡遠逃虎  
口猶絆驥蹄今以一言爲賢二代可數豈但渭陽之族  
坐振重名漂流淮徼之居來承碎職遂茲響應用試才



能既知各有司存唯在聿修厥德事須充補楚州營田奉國巡官

柴巖充洪澤雨塘巡官楚州營田  
牒奉處分三農就稔一概推功苟非浚降雨之渠何以致如雲之稼俾無墮墮固藉專勤前件官壯志不渝公才可任承乏而善參軍事慎終而益見吏能今以洪澤近封雨塘美號徵小喻大昇高自卑爾其靜勗冰心潛窺水脈勉稟龔黃之令遠繼田曹無慙鄭白之名有虧地利高懸賞罰用試否臧事須差充楚州營田院洪澤

雨塘專知官

許權攝觀察衙推充洪澤巡官

牒奉處分撫俗所先勸農爲最是以鄭渾則奪其獵具溫嶠則請置田曹仰順天時俯徵日力俾督耕夫之業須憑幹吏之才前件官歷試已多忠勤可獎令尹之功成製錦督郵之政克提綱但承闕乏之時皆有輯綏之譽今以山陽沃壤淮畔奧區地占三巡田逾萬頃非乏決渠爲雨尙虧多稼如雲蓋謂編甿不勤功於穠蔘縱當稔歲皆失利於稻梁知爾奉公勸民務本若使耰而



不輟必期敏則有功委以農時假之使職永言從政實  
可與權無取潤於膏腴苟徇私於毫髮勉施乃力廣諭  
眾心事須差攝觀察衙推充洪澤巡官兼都巡勘指揮  
奉國謝陽等巡務者

王榮端公知丹陽監事

牒前件官蹈冰守節飲水安貧靜吟而篋有新詩寂坐  
而門無雜客卓爾君子宛然古人今以將濟軍須誠資  
吏術少輟琢磨之業俾專鼓鑄之權想夷甫之不言無  
虧祖德思仲宣之未遇勉俟官榮事須差知丹陽監事

臧澣知鹽城監事

牒奉處分若官無直道則利有多門凡厯任於牢盆或  
成資於潤屋而乃就此繁劇守其潔廉心誅則不惹脂  
膏智刃則能分髓髀嘗聆斯語罕覩其人前件官雅淡  
裝懷清勤縮務嘗握由拳之權課唯遵止足之規模休  
替未遙功勞可驗更資厯試必濟重難展才於近塩之  
鄉守節於作鹹之地不須對雪空中吟謝朗之詩只在  
熬波言下見張融之賦事須權糶使巡官知鹽城監事

趙詞攝和州刺史



牒奉處分昔張緒子充少好遊獵右臂鷹左牽犬緒見  
而謂曰一身兩役無乃勞乎充跪答曰丈夫三十而立  
今二十九矣請至來歲緒曰過而能改顏氏子焉其後  
折節修身終爲賢達則古之豪俊今可規模前件官脫  
跡迷途投身義域永除惑志可獎悛容既能資父事君  
是得居官理務俾參上佐用試忠誠况當缺榮之時好  
縱安居之樂詞其勉輸後効善補前愆已銷九族之憂  
無起一朝之忿事須差攝和州刺史

桂苑筆耕集卷十三終

南海譚瑩校

桂苑筆耕集卷十四

舉牒二十五首

淮口鎮將李質充沿淮應接使

淮陰鎮將陳季連充沿淮應接副使

宋再雄差充水軍都知兵馬使

蘇聿補衙前虞候

曹威轉補散兵馬使

許勅授廬州刺史

孫端權知舒州軍州事

朱鄴補討擊使



郝定補衙前兵馬使

客將哥舒璫兼充樂營使

王處順充鹽城鎮使

張晏充廬州軍前催陣使

歸順軍補衙前兵馬使

安再榮管臨淮都

呂用之兼管山陽都知兵馬使

獬豸都將

宿松縣令李敏之充招討都知兵馬使

張雄充白沙鎮將

安再榮充行營都指揮使

徐莓充權酒務專知

柳孝讓知白沙場權酒務

行營都虞候

曹鵬知行在進奏補充節度押衙

朱祝大夫起復

上都昊天觀聲讚大德賜紫謝遵符充淮南管内威儀指揮諸宮觀制置



淮口鎮將李質充沿淮應接使

牒奉處分用兵之難擇利而動不論遠者近者須賴犄  
之角之在安思危有備無患前件官名超廣利勇繼雄  
飛自提外戍之軍每審中權之要彼徐寇以屢侵吾圍  
莫戢其鋒急之則鼠竄彭墟緩之則豕豕楚岸遂徵眾  
旅俾剗羣克豈從援溺之權將助焚枯之勢爾其指呼  
順命擒縱成功終令入海之波偏能流惡乃使映淮之  
月早見洗兵茂賞高懸良時倏往勉思委寄勿負利終  
事須差充沿淮都應接使便仰量出兵士討除賊徒

淮陰鎮將陳季連充沿淮應接副使

牒前件官勇於戰賊樂在從軍操戈而只待春喉發箭  
而曾無曠自自居遠戍久練雄兵每聆捍蔽之勞能息  
奔衝之患今則未殲彭孽猶役楚軍將資首尾之權是  
成蛇陣固藉爪牙之利共展豹韜爾其跡脫五符身居  
貳職專防險道佇靜長淮雖云迴繞之川未是縈紆之  
地坐思前哲猶傳胯下之蹤立取奇功好豁胸中之氣  
勉期竭節實謂逢時事須差充沿淮都應接副使便仰  
量出兵士討除賊徒



宋再雄差充水軍都知兵馬使

牒奉處分舟楫施利干戈騁威自古爲難在今所急固  
托縱橫之畧始成捍蔽之功前件官學劍有成彎弧自  
許嚼彘而當年逞俊曳牛而是處爭雄高列軍門深遵  
義路久居江戍妙練舟師今以泗上流災淮中聚寇旣  
犯觀風之境頗昏映月之流爾其總握雄兵遠張祕策  
陸織蛇豕水截蛟螭早令賊壘皆平永使驚波不起用  
官物而討官賊吾不爲難探虎穴而得虎雛爾當自勗  
事須差充水軍都知兵馬使部領諸兵馬討除淮內賊

徒

蘇聿補衙前虞候

牒奉處分古之有言以小諭大則祁奚之請老也旣當  
問嗣能自舉親情不涉於阿私事何妨於委用前件官  
早從吏役久習武才父也暮年旣思休退子之壯氣可  
代勤勞且令職在於早趨乃欲功歸於歷試無爽聿修  
之訓勉成負荷之規事須補充衙前虞候

曹威轉補散兵馬使

牒前件官勇而好禮勤以從戎比者逞陳眾之言詞傳



郭維之訊問果驅險浪皆赴順風尋值沛戎來侵楚壤  
首登鶴列深挫豺牙摩壘而每能率先殷輪而不欲言  
病忠誠勵已壯節驚人今則郡守論功材官受賞俾昇  
峻級用報前功事須轉補散兵馬使

許勅授廬州刺史

牒奉處分良二千石古難其人屬郡之中吾有所試勤  
修靜理今得人焉前件官自舉六條已踰四載邑無吠  
犬境絕飛蝗外令邱井乂安內致閭門肅睦政聲則有  
口者謂詠仁譽則無翼而奮飛遠達宸聰果霑殊寵美

秩已題於龍劔雄威愈振於隼旟旣消除水之災來作  
廬江之福分憂救瘼能諧聖主之心紅旆碧幢豈落他  
人之手事須准勅授廬州刺史

孫端權知舒州軍州事

牒奉處分昔李弼有言大丈夫生世須履鋒刃以取功  
名安可碌碌依階求仕是乃蓄志能壯謀身克成夕脫  
羔裘朝驅熊軾不慙往哲其在茲乎前件官族繼興公  
術傳武子能揚俊氣久練雄師常安乞乞之徒果就循  
循之誘今則委之郡政試以公才旣逢豹變之秋善守



龍舒之境為邦致理必見三年有成向國輸忠勉令百姓無患即迎帝賞更峻官榮事須差權知舒州軍州事

朱鄴補討擊使

納助軍錢遂加職賞

牒奉處分漢有卜式者輸家財助軍費遂乃出自牧羊豎子終為司憲大夫忠誠所施其利甚溥前件官石非裕裕鐵實錚錚知義重而財輕遂忘家而報國天龍地馬不藏私室之中尺籍伍符可列軍門之下俾昇峻級以諷頑氓既有賴於金多無自驚於銅臭事須補充討擊使

郝定補衙前兵馬使

能手射七十步

牒奉處分弧矢之利武藝所先號猿而永播嘉聲落鴈而能傳妙技况乃只憑五指能代六鈞豈唯邁古超今可謂神功聖術前件官早攻手射善應心機不彎三百斤弓能發七十步箭紀昌若見必想張弦呂布相逢固慙撚箭既抱非常之伎佇成可久之功換滑臺之舊資陟隋苑之高級事須補充衙前兵馬使

客將哥舒璠兼充樂營使

牒前件官動彰毅勇靜保兼中早成學劒之功不墜為



裘之業頗經歷試無怠事修久委賓司既見與言之可使俾兼樂職必期飾喜之克諧爾其有禮為先無荒是誠迎送於燕臺鄭驛指揮於迴雪遏雲勿使英賢或發養痾之誚須令艷麗先緘笑璧之聲事須兼充樂營使

王處順充鹽城鎮使

牒奉處分夫藩鎮之為制也中屯銳師外列諸戍用備腹心之患固憑爪牙之勤前件官深蘊壯圖挺生勇氣姜維若在未占雄兒焦度相逢應饒健物每展報恩之節累申伐叛之功眷彼鹽城居於海岸苟或一同失理

實為四遠多虞遂徵處順之名俾守防奸之任爾其效勇夫之重閉致危俗之安居慙固封疆無念及瓜之限但逢寇孽勉揚破竹之聲事須補充鹽城鎮使

張晏充廬州軍前催陣使

牒奉處分師克在和兵貴在速若許緩其善陣誠為挫彼奇鋒用之則行時不可失前件官志能傳畧名可止啼待逢盤錯之難願展縱橫之術今則舒猶叛楚衛已伐邢雨雖潤於興師雲未銷於結陣遂使魚麗猛勢阻掃氛埃蟻聚頑徒敢安窟穴爾其驅之以馬箠訓之以



木苑筆身卷十四  
豹篇事唯託於一麾功必成於百勝將迎軍賞佇送捷  
書事須差充廬州軍前催陣使

歸順軍補衙前兵馬使

牒奉處分前件官身榮豹飾志習龍韜奮心於擊鼓其  
鏜騁力於挾輶以走早歸信義無憚勤勞去正寇據屬  
城兵徵諸郡共誅微孽各誓前驅既遵令於牙璋宜陟  
名於甲騎聊遷職秩用報軍功爾其勿替忠誠更邀上  
賞事須補充衙前兵馬使

安再榮管臨淮都

牒奉處分西魏王罷率眾拒寇乃杖白梃大呼而詬曰  
老罷當道臥糞子那得過敵見威勇果自驚奔則知猛  
將之名能奪叛徒之魄前件官夙精韜畧歷試機謀嘗  
犯重圍決成獨戰實可謂神出鬼沒豈唯缺左旋右抽  
今之武力雖衰壯心益勵臨事而猶能強飯即戎而寧  
欲素飡蠢彼頑克騷然侵擾雖徵眾旅未建奇功眷彼  
臨淮處於要地其在訓之以三令激之以一呼審詳於  
彼竭我盈成就於先難後獲老驥免嗟於伏櫪無令駑  
馬爭先秋鷹既遂於下韝勿使妖狐得便事須差管臨



淮都

呂用之兼管山陽都知兵馬使

牒奉處分仲尼云寬則得眾信則人任焉嘗聆斯語今見其人前件官慶襲玉璜業精金版遵直道而利有攸往奉公家而知無不爲是以晉作新軍權資處右齊行勇爵象許居先乃裨察俗之規動叶安民之策遂得晨羊能飲夜犬停喧永除奸濫之源深得撫綏之道今以屬城多難散卒無依窮猿旣切於投林飛鳥猶思於擇木羣情所附戎畧可嘉俾安其督督然來實倚其多多

益辦無辭兩役用展長才事須兼充山陽軍都知兵馬使

獬豸都將

牒奉處分凡標軍額須警眾心如指喻之非宜則訓齊而何在况乃均霑好爵共荷殊恩跡雖限於柳營秩盡昇於柏署宜加一等俾異三行前件官壯氣挺生忠誠卓立曠弩則前無強敵荷戈則動有成功累建戎勳遂霑爵賞今以狼星未滅鯨浪猶翻將申戮暴之能用示觸邪之號爾其勉思一角永息二心佇銷封豕之災勿



失神羊之性事須補充獬豸軍都知兵馬使

宿松縣令李敏之充招討都知兵馬使

牒奉處分昔來護者立性卓犖初讀詩至擊鼓其鏜踴躍用兵羔裘豹飾孔武有力乃捨書歎曰夫人在世固當如是會因滅賊以取功名安能區區專事筆硯其後果申壯志累建殊勳則知奇才所爲何代不有前件官精詳吏道旁習戎機假百里之威則疲曠獲賴作萬夫之長則義旅知歸遂得縣道肅清鄰藩倚賴欲破斬春之狡窟遙分江夏之兵權罷從役於驅雞佇承乏於建

隼聊加職賞俾振軍聲是乃丈夫雄飛君子豹變勉驅甲騎遠應羽書旣設援於他邦必保安於吾圉事須補充節度衙前兵馬使兼充西南招討都知兵馬使

張雄充白沙鎮將

牒奉處分昇高自卑君子所以勵素志辭大就小古人所以傳令名但能守節不虧固在相時而動前件官密懷義勇深貯謙和頒條而政有嘉聲馭眾而軍無愠色今以新恩未降銳旅何安眷彼古津實爲要路是成鎮務乃在江壩旣居使府之要衝宜假公才而管轄况兼



桂芳集卷一四  
場課可瞻軍須且卷豹韜其養斬蛟之勇佇迎鳳詔別  
遷建隼之榮事須差權句當白沙鎮務兼知場司公事

安再榮充行營都指揮使

牒奉處分昔曹公爲樂府歌云老驥伏櫪志在千里烈士暮年壯心不已今猶古也我得人焉前件官百戰成功一麾出守曾安海俗永振風聲而乃不求更握虎符唯願終申豹畧豈覺老之將至每俟用之則行今以大慙未殲外方多難諸藩命將無非竹簡探名遠道徵師或是葵邱代戍苟虧忠勇何蕩妖寇遂付重權佇觀奇

策其在身先行伍顧指軍兵勉揚矍鑠之名無致遷延之役時不可失往矣敬哉事須差充行營都指揮使赴壽州西面備禦討逐黃巢徒黨者

徐莓充權酒務專知

牒奉處分前件官發跡戎行研心吏道忠勤所至幹濟可觀今則舉漢代之權宜搜杜康之利潤瞻吾軍用藉爾公才旣非若處先登無與眾人皆醉事須差句當天長縣權酒務

柳孝謙知白沙場權酒



牒奉處分前件官直道立身公途勵志學已窺室家之  
富任曾致州縣之勞今以備食三行搜資六物豈使弊  
歸於下只令利在其中勉稟條章早申績効俾不欺於  
釀具無自陷於醉鄉事須差知白沙場權酒務

行營都虞候

牒奉處分前件官勇而好禮敏則有功膂力甚強腹心  
可委今以齊驅勁卒俾剗羣兇爾其紕摘行間防虞境  
外宜拘小節善事上官勿謂忠貞有乖緝睦能成勤効  
不恡甄酬事須補充行營都虞候

曹鵬知行在進奏補充節度押衙

牒奉處分藩侯所任邸吏爲先能傳萬里之音不墜九  
霄之命固憑幹濟方付重難前件官魯劇長材魏仁雄  
族雖處干戈之列早開刀筆之能遂使遠赴行朝專司  
遞務觀六龍之仙蹕每審巡遊傳九鳳之王言曾無阻  
滯以茲厯試深可獎酬今已秩亞憲卿官昇典午身得  
趨於輦路職未稱於轅門俾假牙璋遙分甲騎慎達上  
天之旨以安外地之心爾能竭誠吾不恡賞事須改補  
攝節度押衙依前知行在進奏



朱祝大夫起復  
牒奉處分事繁金革禮奪苴麻魯公制之於前晉侯行之於後蓋乃從權順變是爲移孝就忠苟不忘家將何報國前件官方從戎役每藉公才遽鍾風樹之悲永遠霜槿之養能勤泣血唯恐奪情然以羣寇未殲列藩多事確執三年之愛仰辜萬乘之恩况承勅命指揮已許軍前驅使出如綸之睿旨旣俟成功衣夫錦之格言豈同前哲時異事異念茲在茲揚名顯親竭力從命孝之終也往矣敬哉事須牒舉起復差往五嶺已來領會軍

前公事

上都昊天觀聲讚大德賜紫謝遵符充淮南

威儀指揮諸宮觀制置

牒大德真璞混成靈源廣潤淘俗態於心水瑩仙安於面冰蓬島神仙應待銜杯之樂茅家兄弟敢攀執袂之遊猶思救苦於寰中尙阻追歡於物外屬以陣蛇出穴戎馬生郊每勤齋敬之心深假護持之力達聖聰而有謂施醮禮以無虧今則秦嶺烟昏難尋四老楚淮月皎幸伴八公但以桂苑繁華揚都壯麗旣見星壇月殿處



處荒摧難期鶴駕霓旌時時降會欲設精嚴之備須資  
揚統之權白馬將軍方役大朝之元帥青牛道士暫充  
下界之仙官比年既遂於攀留他日必同於輕舉事須  
請充淮南管內威儀兼指揮諸宮觀莊田等務

桂苑筆耕集卷十四終

南海譚瑩校

桂苑筆耕集卷十五

齋詞一十五首

齋詞 一十五首

應天節齋詞三首

上元黃籙齋詞

中元齋詞

下元齋詞二首

上元齋詞

中元齋詞

下元齋詞



黃籙齋詞

禳火齋詞

天王院齋詞

爲故昭義僕射齋詞二首

應天節齋詞三首

道士某乙言伏以聖人降生王者嘉應包天地之大德  
啓日月之殊祥是以電繞虹流克符龍質握乾披震允  
叶龜書伏惟聖神聰睿化哲明孝皇帝紫府真宗丹陵  
寶命孝理而勤修一德化成而胥悅萬方偶以犬吠堯

威熊驚漢御猶軫泣辜之念暫勞展義之行今者風振  
南薰方在長羸之節星瞻北斗乃當誕慶之辰莫不山  
靈供萬歲之歡聲河伯獻千年之瑞色仰資聖壽敢設  
仙齋廣成子之微言旣傳眾妙華封人之善祝實繫羣  
誠伏願德乃日新禍當天悔暫興時雨遍洗妖氛高整  
鸞旗早迴鳳輦然後搜濟汾之詠撰封岱之儀傳芳於  
玉葉金枝積慶於天長地久使蠻戎率服蠢植咸蘇仰  
沐華胥之風齊登仁壽之域普天率土永賀昇平

又



道士某乙言伏以父天母地帝道所以爲尊貫月繞星  
靈符於是乎在况覩一人有慶固知萬壽無疆伏惟皇  
帝陛下龍握丕圖鳳資聖紀播休聲於里社標盛禮於  
高禩今者風調舜琴日緩羲轡草舒芳於八葉丹陵  
降瑞於千齡謹設仙齋仰陳善祝伏願塵銷九野波息  
四溟早迴西幸之儀便舉東封之禮一千年之休運高  
建武功三十世之昌期倍延福祚允諧大定永賀中興  
又  
伏以瀨鄉白鹿旣掛仙蹤函谷紫雲果資王氣積慶於

天長地久傳華於聖子神孫耀玉京而我李長春演金  
籙而莊椿永茂伏惟皇帝陛下三無稟德萬有覃恩叶  
感星夢日之祥掩四乳八眉之瑞上天降聖爰乘解愠  
之風列士修齋况值晏陰之月伏願峒山順軌汾水迴  
鑾迎萬歲之巖音歸九重之天闕享七百年之休運寰  
宇中興守五千字之格言兵戈大定仰祈元鑑永護皇  
居

上元黃籙齋詞

年月朔啓請如科儀伏以有德不德無名可名自施倏



忽之功莫究希微之旨是以紫府乃修心可到元關非  
用力能開臣志慕真風躬行正道但以漢良前筋猶勞  
戰伐之謀越蠡扁舟未遂優閒之望既榮人爵須報主  
恩誓殲無賴之徒久練不祥之器動拘俗役慮犯元科  
今則節已及於上元災未銷於下界謹修常醮仰貢微  
誠所願梟覆頑巢鳳迴仙駕帝座與三台永耀王畿與  
九牧皆安雷驚而蟄戶全開風掃而妖氛靜息俾臣靈  
根日茂至業天成虎符提闔外之權終安澤國虹節指  
壺中之境得認家山臣無任虔肅禱祠懇悃之至謹辭

中元齋詞

年月朔啓請如科儀伏以道本強名固絕琢磨之理身  
爲大患深驚寵辱之機能審自然而然必知無可不可  
是以雕辭贊美則乖妙旨於混成矯志求真則爽奇功  
於積學冀標玉籍在守金科臣才謝半千雖慙賢路心  
凝正一早叩元關齋誠於八節三元鍊志於龍緘鳳蘊  
但屬鯨翻逆浪蟻噴毒沙數年興蠹螫之災萬姓抱瘡  
瘼之苦三尺劍高提在手須救危時六銖衣輕掛於身  
未諧夙願今謹因中元素節大慶良辰依寶壇而醮設



常儀企仙闕而拜申精懇伏願真風蕩滌元澤滂流吾  
君享萬歲於巖音賢相耀六符於渭訣調舜絃之美化  
永復歲期漏湯網之克徒咸歸顯戮然後戴髮含齒鱗  
潛羽翔不知日用之功各遂天成之樂俾臣代勳善繼  
真位高遷畱形於烟閣雲臺縱賞於芝田蕙圃鑄金追  
想終榮聖主之恩叱石閒遊得效仙人之術儻非過望  
敢不精修臣某無任祈恩謝過虔禱懇悃之至謹辭

下元齋詞

年月日啓請如科儀伏以教資妙用無爲而無不爲道

在勤行不厭是以不厭苟得捧持三寶必能極護萬靈  
須憑善建之根株始覩混成之闔闕故曰大丈夫處其  
厚而不處其薄居其實而不居其華者也臣雖塵役拘  
身而雲裝掛志大成是望上達爲期每依郭璞詩中精  
調五石願向葛洪傳上得寄一名所以仰欽象帝之先  
豈在他人之後聽爛柯翁之說則倍惜光陰覽抱朴子  
之言則不虧忠信但以卑棲俗累深握兵符政刑之得  
失難調賞罰之重輕易忒暗堆憊咎莫補精修况叨真  
位之榮恐負元科之責是以三元八節顯醮遙祠唯期



致力於九層未曾妨功於一簣今則天吏叩應鍾之候  
水官攬元轡之時月數就盈日辰在望仰投靈地敬設  
寶壇備儀於琳几瓊盤注賞於金臺銀闕冀感通於良  
夕能濟援於危時伏乞太上三尊十方眾聖曲垂元鑑  
俾遂丹誠早迴翠輦於長安復振皇風於正始秉陶鈞  
者永諧德化仗節鉞者共戢兵戎波濤靜寢於四溟氛  
霧豁開於九野樹下有推功之將草閒無求活之徒至  
於翔翼躍鱗跂行喙息偕登仁壽之域不躡昏迷之途  
使臣深結道緣遙申齋願望三清於通路資一漑於良

田此時枕越石之戈暫妨高臥他日把浮邱之袂豈訝  
後來臣某無任瀝懇投辭虔禱惶切之至謹辭

又

年月日啓請如科儀臣伏以測管窺天雖乖曠望揮戈  
駐日蓋感精誠苟爲山之力不虧則至海之期何遠仰  
元門之善閉遵妙道以勤行但以爲子爲臣日忠日孝  
旣增榮於國祿願無忝於家勳手握玉符且救寰中之  
難志棲金籙唯思象外之遊每慮政失務三法虧畫一  
雖慎撫綏於南充尙多憊咎於北艷况當翦寇爲期弭



兵未暇今則月就盈數日臨下元遙做真儀敬陳齊法  
儼星壇而稽首想風馭以馳魂伏乞太上三尊十方眾  
聖元德見蔭良願克諧翠華早耀於秦雲皇祚永興於  
漢日百官多慶八裔同歡寇戎則銷燧象之灾幽滯則  
假燭龍之照然後使臣世官貞吉道業滋成遺榮待泛  
於五湖企想潛通於三島作人間之都尉蒯訓無心拜  
天上之侍郎沈羲有望唯願在家必達終能直道而行  
臣無任祈恩懺罪虔切惶恐之至謹辭

上元齋詞

年月日啓請如科儀臣仰察元經乃見道資眾甫俯稽  
聖典則知神應至誠是以早詳病病之言每勸賢賢之  
行五音五色實除耳目之娛六甲六丁潛致爪牙之役  
願躡輕飛之路常敲眾妙之門但屬戎馬生郊陣蛇奔  
穴無苟免而臨難不得已而用兵蓋報主恩慮虧臣節  
只誓顯誅寇孽寧知暗積憊殃雖軍律克申而真科是  
懼今以日延和景月滿初元遇吸新吐故之辰懺喙腐  
吞腥之罪儼陳醮禮敬薦齋誠燈耀九光燼焚百和寂  
寥塵外幡幢靜設於星壇髣髴雲中環珮似傳乎風馭



冀銷妖祲仰告威靈伏乞大降元慈下從丹懇萬乘永  
資於萬壽百官皆荷於百祥戰場則荆棘叢生農壤則  
麥禾花茂凡云蠢動盡獲昭蘇然後俾臣援溺功成奉  
身以退冲靈道遂鼓腹而遊飽瓊藥之饌糧就瑤臺之  
蹊徑遇圯上者終諧素志自有前蹤入壺中者蓋感專  
心寧無後望旣殊捕影敢憚勞形臣無任悔過祈恩虔  
切惶恐之至謹辭

中元齋詞

啓請如科儀域中之四大難名字之曰道物外之三清

在想心以爲齋豈徒滋福於一身唯願洽恩於萬彙臣  
生逢聖日志慕真風寧貪久視之門有覬輕飛之路但  
以行先不殆德貴有餘每虔一氣以存思非止三元而  
展敬今則雲摧火影風戛金聲當中元積慶之辰謹修  
常醮以下界罹災之事仰告元慈一昨夏景旣闌秋成  
甚邇而乃曠野則飛羊斂翅深泉則黑蜃藏鱗嗷嗷之  
黔庶何依烈烈之蒼穹莫訴雖近沾美澤而尙慊農郊  
伏乞太上三尊十方眾聖下從精懇大庇生靈使風雨  
常調烟塵永息興聖祚於千秋萬歲振歡聲於四海九



州然後俾臣功名則與國同休道業則在家必達水中  
泛泛謝時態之澆浮雲外飄飄逐仙蹤而騫翥既探珠  
而有望寧種玉以無因臣不任祈恩救災懇禱虔惕之  
至謹辭

下元齋詞

啓請如科儀伏以混成至道本在勤行眾妙元門唯資  
善閉故曰修之身則其德乃貴修之國則其德有餘既  
能事少功多可謂暫勞永逸臣雖手提金鉞而心寄瑤  
臺飄飄然自有良期擾擾者誰知積學是以三元致敬

一氣存思佇天上之雞聲潛縣素望待海中之鶴信每  
瀝丹誠終冀用之則行豈言深不可識今者謹資薄禮  
仰贖元慈所願漸茂靈根漸拋俗界餌唵嚙之奇草飲  
沆瀣之仙漿漢代淮王終遂仙游之樂周時柱史何妨  
吏隱之名苟保天成何言日損景仰於其中有象願知  
於此外無求臣無任投辭懇迫虔禱兢越之至謹辭

黃籙齋詞

啓請如科儀臣身拘俗網志仰真筌雖窈窕冥冥至道  
則無形可叩而勤勤懇懇精心則有感必通是以每勵



焚修敢安暑刻所冀學海而終歸巨海好龍而不懼真  
龍豈貪輕舉之名但效勤行之旨然以早分相印久握  
兵符當扶危靜亂之秋有戮暴誅奸之役伏慮政條失  
所刑律乖宜愆違暗積於元司殃咎難逃於黑籍今則  
景銷木德節啓火威稽首昊天叩心靈地跼踖而謹陳  
薄奠禱祠而仰獻微誠伏乞太上三尊十方眾聖俯矜  
丹慊深降洪慈使電滅千灾雲興百福永資元蔭漸茂  
靈根掃閭外之烟塵早成勳業玩壺中之日月免役夢  
思臣無任悔過祈恩懇迫惶恐之至謹辭

禳火齋詞

年月日啓請如科儀於紫極宮內修建洞淵妙齋三日  
四夜轉經行道爲禳當府火灾祈恩投辭上詣虛無元  
始天尊伏以波蕩四溟塵昏九野遂見綿區匝宇未能  
滅稜消氛臣雖志悅道風而身沾睿澤早託山河之誓  
久臨淮海之封每慎撫綏不遑寧息粗安一境已涉五  
年齋誠仰貢於上元妖氣願銷於下界豈料天心悔禍  
必俟時期地分罹殃難逃歷數方當暮月始起融風遽  
興鄭國之灾難施瓘學將救成都之急誰噉酒杯所燃



既多俱焚是慮厥力猶勤於撤屋羣心免駭於燎原今  
則每念傷人唯知罪已仰投靈宇敬醮寶壇祓禳奠異  
於四郊寧拘古禮祈禱遠瞻於三島但獻精誠伏乞太  
上三尊十方眾聖曲流元澤大挫陽精使回祿知非祝  
融請罪閭閻撲地皆除火宅之灾道路生風永作水鄉  
之福烝黎樂業師旅懷安構陰謀者自就消亡歸善化  
者名資榮泰齊登壽域仰望仙鄉臣無任歸罪乞恩虔  
禱懇迫惶恐之至謹辭

天王院齋詞

唐中和二年太歲壬寅正月望日具銜某敬請僧某乙  
設齋於法雲寺天王院謹白言舍利佛大慈大悲觀音  
菩薩伏以欲界將傾魔軍競起九野塵昏於劫燼四溟  
波蕩於狂飈諸侯志慕於宋公星無三徙聖主德齊於  
漢帝日未再中不知天養鴟梟地容螟螣力鬪之羣克  
得便義征之眾旅摧威某也手握兵符心抱將畧欲展  
焚枯之力願成拯溺之功是以景仰三歸勤行十善深  
憑護念敢啓邀迎宇內瘡痍畧假醫王之術世間疲瘵  
遍希慈父之恩今則幸遇初元精修美供春露灑琉璃



之境曉風吹蒼葡之香想其舍衛城中長老盡攜弟子  
水精宮裏天王便作主人伏願舍利佛大慈大悲觀世  
音菩薩教既東流跡能西降遠救閻浮之地暫離兜率  
之天問疾語言不競維摩之說稱名功德可逃羅刹之  
灾惟願共泛慈航齊揮智劍寢驚濤於苦海掃妖氣於  
昏衢則乃慧燈照天帝之心法鼓破波臣之膽靜銷諸  
惡暫開方便之門廣庇眾生無惜慈悲之室謹疏

為故昭義僕射齋詞二首

中和二年七月二十三日為故昭義姪孫僕射及二孫

子敬設齋于法雲寺聊憑法疏用寫悲詞以昭義姪孫  
幼蘊壯圖長居重任不掃一室有志四方手運豹韜既  
是吾家之事身持龍節累沾聖代之恩至於越海征蠻  
對河分陝立戰功於遐徼傳理化於近藩慎守詔條能  
諧物議遂移上黨實委外權尊屬戎馬生郊陣蛇出穴  
遽聆寇孽直犯京華頻興伐叛之師稍急訓戎之令上  
將則雖期徇難欲竭忠誠小人則多是幸灾潛興狡計  
叛徒忽至橫禍斯侵宏演納肝其誰能繼艷舒傷目所  
不忍言噫道則日彰志惟天奪征旌永卷飛旒爰來言



念凋零莫勝悲慟但以推尊佛理仰割俗情既知前世  
因緣粗解此時冤痛况乃父立忠節子揚孝名古賢所  
稱今我所恨俾資冥福敬設妙齋所願慧炬照迷慈航  
援溺早推誠於貫日終致樂於生天子子孫孫永絕怨  
讎之本生生世世常逢安泰之期謹疏

又

中和二年七月二十七日某官某乙奉太尉處分爲故  
昭義僕射於法雲寺設三百僧齋並寫金光明經五部  
法華經一部永充供養蓋聆佛修慧力普濟羣迷人發

信心終成善願苟得影從至教必能響答虔誠伏以昭  
義僕射夙振雄圖繼分重寄將軍投袂練兵而方切專  
征天子翦衣飛詔而唯憑妙畧佇建鼓中之勲業忽罹  
意外之灾殃不弔昊天奪我良允今則敬投蓮宇虔設  
桑門仍缺貝葉之真蹤仰奉法華之妙義伏願乘茲功  
德解彼冤讎灾星昔照於豫州已推定分慧日今懸於  
覺路永絕良緣謹疏



桂苑筆耕集卷十五

南海譚瑩校



